

Las paterlieras

Tgei strias tschatschras, strias fieras,
Fan en in vitg las paterlieras,
Cu duas ni treis ensemen stattan
E dils vischins la bucca dattan!

Co ei san ord muschins far vaccas
E dir da quels e tschels pulaccas!
Co ei lur nauschas lieungas gezzan
E sin tuts mauns lur tissi sprezzan!

Perfin il farrer sin pervenda
Sto ver enquala greva menda,
E pauc ni bia a tuts ei maunca,
A tuts vischins en la vischnaunca!

O contas caussas schon satradas
Recavan quellas tussegadas,
E portan esch per esch silsunter
Ch'ei dattan bunamein en venter!

Cun lur nuvialas e manzegas
Caschunan ei spir cattavegnas,
Spir disfidonza, spir discordia,
En tut il vitg – misericordia!

Perquei da cor jeu vus hassegel,
Jeu da vus tunder mo laghegel,
Vus strias, stodas paterlieras
Sper begls e brocs e caffetieras!

Alfons Tuor